

## U džematu Essen održan godišnji mevlud i obilježen jubilej

U džematu Essen 26.05.2013 godine bilo je sve u znaku godišnjeg mevluda i jubileja. Naime, u aprilu ove godine navršilo se punih 30 godina aktivnog i uspješnog rada džemata. Sa godišnjim mevludom i sa kulturnim programom željeli smo obilježiti ovaj važan i značajan jubilej.



U jednoj prelijepoj džamiji sa munarom proučili smo mevlud, a kulturni program i sve ostalo održali smo u prostorijama namijenjenim za te svrhe koje se nalaze uz džamiju. Posjeta je bila odlična, programi kvalitetni, a organizacija i tehnički dio posla veoma dobro i kvalitetno odrađeni.

Poslije klanjanja podne namaza, Džemal ef. Hasandić, Imam u Essenu poselamio je sve prisutne i podsjetio na period od 30 godina, koliko džemat uspješno radi. Kazao je da je ovo uspjeh svih nas i jubilej svih nas jer smo svi na svoj način učestvovali u izgradnji džemata.

Podsjetio je Džemal ef. na kur`anski ajet: “ A ko govori ljepše od onoga koji poziva Allahu, koji dobra djela čini i koji govori: `Ja sam zaista musliman´. “

Također je podsjetio na riječi Božijeg poslanika Muhammeda a.s. koji je rekao: “ Reci: Ja vjerujem u Allaha, zatim ustraj u tome. “

Zahvalio se Džemal ef. svima na njihovom učešću u izgradnji i jačanju džemata, i pozvao da i dalje zajedno istrajemo u činjenju dobra.

Poslije mevluda, a povodom jubileja, obratio se predsjednik džemata Almir Brčaninović. Govor predsjednika prenosimo u cijelosti:

*„Bismillahirrahma nirrahim*

*Poštovana braćo i sestre, cijenjeni Imami, uvaženi gosti, draga omladino*

*Esselamu alejkum ve rahmetullah*

*Hvala Allahu dz.s. na svim blagodatima, neka je salavat na našeg Poslanika.*

*Meni je pripala čast da ispred našeg džemata i članova Odbora obratim se danas vama koji ste prisutni i koji ste došli da uveličate nas mevlud i jubilej.*

*Ove godine odlučili smo da godišnji mevlud proučimo u ovoj džamiji, a poslije mevluda održimo kulturni program. Razlog je što želimo da obilježimo naš jubilej – 30 godina uspješnog rada našeg džemata. Zahvaljujemo braci Turcima koji su nam danas dali džamiju i sav prostor uz džamiju da možemo da koristimo.*

*Naš džemat ubraja se među prve džemate koji su formirani u Njemačkoj. Džemat je formiran 1983 godine. Uz muslimane iz grada Essena, džemat je okupljao muslimane iz drugih okolnih gradova u kojima nije bilo džemata. Punih 15 godina džemat je radio iznajmljujući prostorije pod kiriju. Malo po malo, džemat je okupljao sve veći broj članova.*



*1997. godine kupili smo objekat za džamiju i za godinu dana uspjeli osposobiti prostorije za obavljanje naših vjerskih potreba. 1998. godine prešli smo u nas objekat i evo 15 godina koristimo naš objekat. Naravno, renoviranje ostalog dijela našeg objekta trajalo je još dugo godina. Danas je kompletan objekat u funkciji.*

*Veliku zahvalnost iskazujemo našim džematlijama koji su neumorno radili na izgradnji i jačanju našeg džemata. Zahvaljujemo našim džematlijama koji su svojim novčanim priložima, svojim pozajmicama, svojim trudom i radom mjesecima radili u džamiji u toku renoviranja i dali veliki doprinos u izgradnji naše džamije.*

*Zahvaljujemo svim džematima, članovima Odbora i Imamima iz NRW-a koji su nas materijalno pomogli i svojim priložima omogućili brze renoviranje našeg objekta. Zahvaljujemo se Mešihatu Islamske zajednice Bošnjaka u Njemačkoj na podršci koju su dali našem džematu u proteklim godinama.*

*Pomoć su nam pružili i ljudi zaposleni u institucijama grada Essena na čemu im najtoplije zahvaljujemo.*

*Ipak; najveći trud, najveći rad, najveći dio novca, najveću brigu i teret podnijele su džematlije našeg džemata. Njima i svima drugima koji su nam pomogli, još jednom iskazujemo zahvalnost i molimo Allaha dz.s. da ih sve obilno nagradi.*

*Za 30 godina rada kroz nas džemat mnogo je prošlo džematlija, učenika mektebske nastave, odraslih džematlija koji su pohađali mektebsku nastavu, musafira koji su nas posjetili, onih kojima smo pomoć dali ili poslali, onih koje smo kao učenike ili student stipendirali.*

*Jednom riječju, 30 godina smo izgrađivali džemat i 30 godina drugima pomagali. Ali, ono što je za nas važno ili najvažnije je to, da smo za ovih 30 godina izgrađivali sami sebe, svoj iman, svoj karakter, svoj moral, svoje biće.*

*Kakva je slika današnjeg džemata?*

*Nas džemat broji preko 300 džematlija. Na mektebskoj nastavi imamo 125 učenika. Objekat koji koristimo potpuno je renoviran i sav u upotrebi. Nemamo duga ni kredita. Džematlije su aktivne u svim našim projektima koje vodimo. Imamo mlade ljude u Odboru koji veoma složno, odgovorno i uspješno obavljaju svoje dužnosti. Uz starije članove džemata, imamo mlade, školovane i veoma aktivne džematlije na koje se možemo osloniti u našim džematskim planovima i projektima. To nas dodatno, uz Allahovu pomoć čini sigurnijim u našim daljim planovima.*

*Stoga, imamo obavezu i dužnost stalno zahvaljivati Allahu dz.s. koji nas je pomogao na ovom putu i učinio nas od onih koji su ispunili i opravdali emanet koji nam je Allah dz.s. povjerio.*

*Kakvi su naši planovi u budućem radu?*

*Prije svega, da budemo svjesni koliko je truda i vremena uloženo za ovo što imamo danas. Da to dobro čuvamo, pazimo i održavamo. Da motivisemo sve one koji još nisu u džematu, da budu, i da svoju djecu šalju na mektebsku nastavu. Da još više radimo na zbližavanju ljudi i da gradimo dobre odnose jedni sa drugima, i jake međuljudske mostove koji će nas još više zbližavati i jačati. Da se pripremamo i da spremni dočekamo zahtjeve koji će pred nas u budućnosti doći, uključujući i razmišljanje o većem prostoru naše džamije. Da nastavimo nas uspješan rad sa svim organizacijama i institucijama sa kojima smo do sada postigli dobre uspjehe i rezultate.*

*Molimo Allaha dz.s. da nas pomogne u našim planovima i poslovima, i da nas Allah dz.s. nagradi sa onim što je za nas dobro na dunjaluku i da nam podari lijepi džennet na Ahiretu.*

*Amin.“*

Nakon što je završio svoj govor, predsjednik je pozvao nekoliko učenika i učenica mektebske nastave koji su željeli da se na ovaj dan zahvale svom muallimu Džemal ef. na trudu koji je uložio i koji ulaze na mektebskoj nastavi. Oni su vrlo lijepo, emotivno i hrabro prenijeli svoja osjećanja i kazali sve najljepše o svom muallimu Džemal ef. Ispred učenika mektebske nastave svom muallimu uručili su poklon kao znak svoje pažnje, zadovoljstva i zahvalnosti. Bilo je to zaista emotivno za sve prisutne u džamiji.

Nakon toga obratio se Muhamed Balaban, nas dugogodišnji prijatelj i čovjek koji je mnogo uradio za nas džemat. Govorio je vrlo emotivno, nadahnut ljubavlju prema Bošnjacima i zadivljen našim dobrim i kvalitetnim radom. Uručili smo Muhamedu Balabanu Ahdnamu sultana Mehmeda Fatiha kao znak naše pažnje prema njemu. Bio je zaista impresioniran tim našim lijepim poklonom koji smo mu dali.



U odsutnosti muftije kao njegov izaslanik, obratio se na kraju Mehmed ef. Jakubović, glavni Imam NRW-a. Prenio je selame od muftije i predsjednika Mešihata, čestitao u njihovo i svoje ime jubilej i vrlo lijepo, utemeljeno sa jasnim porukama govorio o našem džematu. Kazao je da su usponi i padovi sastavni dio rada svakog džemata, a današnji dan govori i svjedoci da su usponi u radu džemata Essen nadvladali padove kroz koje je džemat prolazio. Podsjetio je i kao lijep primjer naveo da je nekoliko džemata formirano iz džemata Essen koji danas uspješno rade i svi skupa zajedno sarađuju.

Mehmed ef. je ispred Mešihata IZBNJ džematu Essen uručio je lijepu levhu u znak našeg jubileja, a imamu Džemal ef. ispred Mešihata uručio je Kur`an i novčanu hediju.

Predsjednik Almir Brčaninović ispred našeg džemata, uručio je poklon, jednu levhu, predsjedniku džemata džamije u kojoj je proučen mevlud i održan jubilej. Na kraju mevludskog programa proučena je deva.

Ručak je bio pripremljen odmah poslije mevluda, a mevludsku sofru obogatilo je 13 kurbana od naših džematlija kao i hrana koju su donijele naše džematlije. Zahvaljujemo našim džematlijama koji su novčano pomogli naš godišnji mevlud i jubilej i molimo Allaha dz.s. da ih nagradi i bereket im poveća.

U kulturnom programu svoje učešće su dali: Aiša i Aida Škrijelj, i Ehlimana Hasandić proučile su jednu lijepu ilahiju. Aiša i Aida prelijepu sevdalinku su otpjevale. Folklor iz Essena u dvije grupe, manja i veća, ukrasile se nas kulturni program sa svojim igrama. Preljepo obučeni, odlično pripremljeni, sigurni u ono sto rade obradovali su sve prisutne. Za njihovo učešće posebnu zahvalnost dugujemo Šemsudinu, Hasiji i Sutki. Nas poziv odmah su prihvatili i odlično svoj posao odradili.

Našim pjevačima: Samiru Burekoviću i Muazu Borogovcu koji su svojim prelijepim glasovima i sevdalinkama obogatili i uljepšali kulturni program i rado prihvatili da budu učesnici u obilježavanju našeg jubileja, zahvaljujemo na njihovom učešću.

Ništa ovo ne bi bilo ovako lijepo da Mirnes Bašić i Elvis Bašić nisu to ukrasili sa svojim prelijepim instrumentima koji su se vrlo rado i sa zadovoljstvom odazvali našem pozivu za ovaj jubilej.

Sav ovaj dio kulturnog programa prošao je vrlo zanimljivo i interesantno zahvaljujući Dženanu Kurspahiću koji je bio moderator svega ovoga. Opušteno, nadahnuto, sa malo humora i šale, Dzenan je bio odličan moderator.

Mnogo je bilo posla, a i mnogo džematlija je pomoglo da sve prođe lijepo i hairli. Svima zahvaljujemo, i neka Allah dž.š. sve nagradi koji su pomogli.

Ovaj prelijepi dan koji će ostati dugo u sjećanju svih nas kao lijepa uspomena motivisao nas je i za dalje uspjehe i napretke. Na kraju, još jednom zahvaljujemo svima koji su uložili dio sebe da ovaj dan prođe svečano, lijepo i u zadovoljstvu svih nas.

**Džemal ef. Hasandić**